

**Angkasa Mahu Jumpa PM Berhubung Tempoh Bayaran Balik Pinjaman Peribadi Bernama  
30 Ogos, 2013**

PETALING JAYA, 30 Ogos (Bernama) -- Angkatan Koperasi Kebangsaan Malaysia Berhad (Angkasa) berharap dapat mengadakan perbincangan dengan Perdana Menteri Datuk Seri Najib Tun Razak berhubung tempoh pembayaran balik pinjaman peribadi sebelum pembentangan Bajet 2014 pada 26 Okt ini.

Presidennya Datuk Abdul Fattah Abdullah berkata pihaknya sudah menghantar surat kepada perdana menteri bagi tujuan berkenaan dan masih menunggu jawapan daripada Pejabat Perdana Menteri.

Katanya, antara perkara yang mahu dibincangkan dalam pertemuan tersebut adalah mengenai permohonan supaya tempoh pembayaran balik pinjaman peribadi dipanjangkan daripada 10 ke 15 tahun untuk penjawat awam.

"Perjumpaan dengan perdana menteri turut dipersetujui oleh Kongres Kesatuan Pekerja-pekerja Dalam Perkhidmatan Awam (Cuepacs)," katanya kepada pemberita selepas melancarkan Jalur Gemilang gergasi dan kempen kibar Jalur Gemilang di ibu pejabat Angkasa di sini Jumaat.

Pada 5 Julai lepas, Gabenor Bank Negara Tan Sri Dr Zeti Akhtar Aziz mengumumkan bank pusat itu menetapkan tempoh maksimum bayaran balik pinjaman peribadi selama 10 tahun manakala 35 tahun bagi pembiayaan pembelian rumah untuk penjawat awam.

Langkah itu bertujuan mengekang hutang isi rumah ketika ini yang berada pada paras 83 peratus daripada Keluaran Dalam Negara Kasar (KDNK).

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=974071>